

# Gen-tec vegn bandischà per tschintg onns

La Svizra è ad interim in'insla senza gen-tec

■ (anr/vi) **Ils Svizzers vulan per tschintg onns naginas vivondas da gen-tec sin il taglier. Cun 55 pertschient da las vuschs han ils votants exprimi ier cler e net lur tenuta.** Per il solit van las iniziativaas federalas da la glatscha giu. Tant pli sa legra cusseglier naziunal *Andrea Hämmerle* ch'il pievel ha acceptà l'iniziativa «per victualias producidas senza tecnologia genetica». «La gliעד na vul betg vivondas da gen-tec sin il taglier», di Hämmerle: «Pli ras retschertgas tar consumers en l'entira EU han mussà che la gliעד na vul nagin food da gen-tec.» Il resultat da votaziun muscia ch'il pievel voteschia consequent e tenor quai ch'el less mangiar.


## «Uss ston ins perscrutar»

Ins stoppia uss agir e perscrutar, di Hämmerle. Sch'ins veglia suenter il moratori lubir da plantar organissemms midads, stoppian ils perscrutaders mussar co ch'ina coesistenza cun plantas da gen-tec pudess vegnir reglada.

Hämmerle ch'è s'engaschà en il comité d'iniziantes refuschescha da gia uss far ponderaziuns davart ina prolungaziun dal moratori. I saja impurtant d'emprim observar tge che capita. Co ch'ins less proceder suenter il moratori, posian ins discutir pir en dus u trais onns.

## Immediat en vigur

La debatta davart l'iniziativa na saja betg stada uschè dira sco p. ex. quella davart l'iniziativa da las



**Andrea Hämmerle:** «La gliעד na vul betg vivondas da gen-tec sin il taglier.»

FOTOS C. CADRUVI

Alps. Era tar lezza iniziativa era Hämmerle tranter ils iniziants. El sa regorda ch'ils iniziants han stuì batter bler pli fitg per cuntanscher in «gea» tar l'iniziativa da las Alps.

Ma l'iniziativa da gens è era en auters puncts pli populara. Per realisar l'iniziativa da gens na dovri naginas novas leschas ed ordinaziuns. Il scumond per ils purs svizzers da plantar organissemms midads geneticamain va immediat en vigur.

## Ils perscrutaders teman

Main cler è la situaziun tar la scienza svizra. Da principi na tanghescha l'iniziativa betg ils perscrutaders. La confederaziun ha gia budgetà 10 milliuns francs per perscrutar la semnada da plantas da gen-tec en il liber. Pro-

ximamain decida il cussegl federal, sche quests daners vegnan uss propi mess a disposiziun.

*Dieter Imboden* ha dubis. El è president dal cussegl da perscrutaziun naziunal. Tenor el na ha la publicitad svizra betg ina tenuta positiva envers studis cun plantas da gen-tec. «Ma era sch'ins è encunter, ston ins savair co ch'i funcziuna», accentuescha Imboden. El tema che blers perscrutaders da la tecnologia genetica gjajan uss en l'exteriur, e ch'ils students svizzers vegnian a guntgir quest rom perquai ch'el n'ha betg in bun image en Svizra.

## L'import è lubi

L'import da victualias ord plantas da gen-tec è vinavant pussaivel. I dastga era vegnir importà pavel da gen-tec.